

養  
吉  
齋  
叢  
錄

養吉齋叢錄卷之八

賜進士出身雲貴總督翰林院編修

臣吳振械纂

春秋世譜以女媧爲伏羲妹又盧同因乾鑿度兄妹爲夫婦之說以女媧爲伏羲婦蓋讐言也而陵殿舊時率埽女像村婦祈嗣香火極盛廟祝因以爲利乾隆間侍郎金公德瑛奉使往祭奏請更正得旨允行

乾隆元年山東巡撫岳公濬言堯陵在濮州城東南六十里古雷澤之東穀林莊明代誤建於東平應改建以爲祭告行禮之所仍於陵前設堯母靈臺祀配以堯妃中山夫人其東平之陵仍令有司時祭從之

附錄 乾隆間錢侍郎載祭堯陵辨今堯陵之非具摺奏陳摺凡二十七扣奉旨申飭錢先典試江南解首顧問三藝

皆駢體磨勘停三科京師因爲對語云三篇四六短章欲於千萬人中大變時文之體一摺廿七餘扣直從五千年後上追古帝之陵

康熙二十八年 聖祖謁禹陵書地平天成額並 敕有司修葺乾隆十六年 高宗謁禹陵 命督撫擇姒姓子姓一人世與八品官奉祀

康熙二十四年 聖祖西巡至西安遣官祭周文武成康漢高祖宣帝唐高祖太宗宣宗陵以周文王武王皆聖君非他帝王可比 命於祭文內書御名致祭

康熙二十三年 駕幸金陵謁明孝陵三十八年南巡復詣孝陵 命求明代後裔俾守世祀時以易代旣久無從訪察議寢其事雍正元年 世宗於 聖祖書笥中檢出未發 諭旨一

道以明太祖崛起布衣統一方夏經文緯武漢唐宋諸君之所未及其後嗣亦未有如前代荒淫暴虐亡國之跡欲大廓成例訪其支派一人量授官職以奉春秋陳薦仍令世襲世宗仰體聖祖如天之心遠法商周推恩前代之盛復命訪求明室子姓一人授官永襲以奉世祀二年遂封朱之璉爲一等侯入正白旗

附錄 內閣會同吏禮二部原奏查鑲白旗朱文元一支係明太祖第三子代簡王桂後崇禎時嗣代簡王監洪承疇軍松山之敗爲我軍所獲姪文元亦被擒今龍溪尉朱汝健官學生朱福烈披甲人朱福瓊等皆文元子孫正定知府朱之璉一支亦代王後

國初於明陵皆致祭惟神宗以用兵之嫌故定議時不之及順

治八年 命祭神宗陵如十二陵例仍設陵戶看守十四年又特製崇禎帝陵碑

明世宗永陵先以尹嘉銓條奏撤其祭祀乾隆五十年 高宗謂前明之亡亡於萬厯天啟世宗雖溺意齋醮尙不至如萬厯天啟之昏庸失德其陵寢仍 命一體致祭

金陵有在房山者明人遼東一役惑於形家之說疑與 本朝王氣相關遂剽斷其地脈且建關帝廟爲厭勝之術此誠極愚不知天命之有歸也順治十四年遣官修復立金太祖世宗陵碑並令有司時祭

祭歷代帝王陵皆於享殿行禮無享殿卽就陵寢設壇惟元陵則望祭 國初定議時尙未有暢春園故元太祖世祖陵在德勝門外望北致祭後建暢春諸園則祭處在 御園南矣嘉慶

十四年梁公上國告祭回京 仁宗詢知其地以爲非宜因命於清河以北昌平州以南擇地致祭

歷代帝王廟明初祀伏羲以下三十六主洪武六年禮臣請專祀創業之主共十六位餘二十位令有司春秋祭於陵寢則商中宗高宗周文王成王康王漢文帝景帝武帝宣帝魏文帝隋文帝唐高祖憲宗宣宗周世宗宋太宗眞宗仁宗孝宗理宗也嘉靖間又從給事陳斐議撤元世祖我朝順治二年增遼太祖金太祖世宗元太祖世祖明太祖共二十二位嗣禮部尙書王崇簡建議謂商中宗高宗周成王康王漢文帝宋仁宗明孝宗宜百世祀部議未允康熙六十一年 命凡曾在位除無道被弑亡國之主外盡宜入祀又以明愍帝無甚過失雖亡國亦宜從祀於是議增一百四十三位乾隆四十九年以原議崇祀

遼金而不列東西晉前後五代又闌入漢之桓靈義未允協因  
取曩時紅本閱之方知其時廷臣既未詳細討論而上疏在壬  
寅十一月距 聖祖大事不數日也漏略不及更定之故蓋由  
於此乃復 命廷臣詳議後議增入者晉元帝明帝成帝康帝  
穆帝哀帝簡文帝宋文帝孝武帝明帝齊武帝北魏道武帝明  
元帝太武帝文成帝獻文帝孝文帝宣武帝孝明帝陳文帝宣  
帝後唐明宗後周世宗撤出者漢桓帝靈帝

舊時配享 太廟惟通達武功慧哲宣獻四郡王乾隆四十三

年追論開國諸臣偉伐殊勳及被誣冤抑始末 命補列禮烈

親王代善睿忠親王多爾袞鄭獻親王濟爾哈朗豫通親王多

鐸武肅親王豪格克勤郡王岳託牌位配享次則怡賢親王允

祥雍正時入配超勇襄親王策凌乾隆時入配以上諸王均西向西則信

勇公費英東宏毅公額亦都武勳王揚古利果毅公圖爾格雄

勇公圖賴忠達公大學士圖海勤襄伯大學士鄂爾泰大學士

張廷玉

鄂張二人雍正時定乾隆時入配

武毅謀勇公尙書兆惠

嘉慶時入配

忠勇

公郡王銜大學士傅恆

嘉慶時入配

誠謀英勇公大學士阿桂

道光時入

配忠銳嘉勇貝子郡王銜大學士福康安

乾隆時入配

以上十二人

均東向以北爲上

按蒙古親藩未有配享者 高宗以額駙策凌名藩尙主晉

爵親王殄靖準夷功在王室爲兩朝勳舊 特命脩食廟廷

令眾蒙古知國家崇獎賢勞中外一體之意

附錄 鄂文端張文和配享 太廟 世宗遺詔載之乾隆

十四年張乞致仕面對以身後不獲蒙配享爲慮欲要一言

爲券 高宗以成命久定亦姑允之并 賜以詩內一聯云



可例青田原侑廟漫愁鄭國竟推碑而次日謝 恩不親至  
大學士九卿卽議停罷配享迨西巡時隨眾迎送又不在道  
旁叩頭然 賜詩 賜冠服諸物令散秩大臣領侍衛十員  
往送禮意尙優渥也時有 皇長子定安親王之喪文和嘗  
爲師傅甫過初祭卽南歸 高宗謂數十年心膂大臣於朝  
廷恩誼忽然不以動心惟以歸榮故鄉爲念若於國家無幾  
微繫屬者益惡之其時太常寺以額駙超勇襄親王策凌配  
享位次奏呈諸臣名單遂降 旨費英東額亦都諸人皆開  
國佐 命允宜侑享大烝卽鄂爾泰亦尙有定苗疆烏蒙諸  
勞績而張實無可配享之理因列其前後過失 命其自量  
應配享與否具摺回奏旋奏臣無開疆汗馬之功又無經國  
贊襄之益年衰識瞶愆咎日滋懇罷配享並治臣罪云云遂

從大學士九卿議罷配享仍留大學士職銜四川學政朱荃  
張親家也朱本呂留良嚴鴻逵案內之人幸及寬典迨爲學  
政以贓私敗因追論文和聯姻庇護罪 命罰鍰追繳 恩  
賜物件免其革職治罪二十年卒於家復奉 恩旨仍遵  
遺詔配享又乾隆間以和琳配享和琳大學士和珅弟也生  
平有過無功無配享理和珅事敗遂撤和琳配享位

乾隆間 盛京建怡賢親王祠 高宗命將 太廟配享之通  
達郡王武功郡王慧哲郡王宣獻郡王及禮烈親王饒餘親王  
鄭簡親王穎毅親王一併崇祀額曰賢王祠所司春秋致祭以  
昭開國翊運之勳

雍正二年建昭忠祠祀開國以來致命盡忠諸臣八年建賢良  
祠於京城白馬廟之側凡滿漢大臣才德著聞完名全節者與

焉十年復 命直省於省會各建賢良祠以祀外任大臣之忠誠政蹟卓然可紀者又直省建節孝祠自雍正元年始

附錄 乾隆間以賢良大臣之子孫漸就零替 命督撫訪其嫡裔如無官或官甚卑者送部引見候 旨文官七品以上武官五品以上則毋庸查奏

定例陣亡官員始入中外昭忠祠惟內大臣公海蘭察由西藏回京以病歿於家 高宗念其出師多年勦勞甚大 特命入昭忠祠

附錄 曹申吉由侍郎出爲貴州巡撫吳三桂叛曹遂從逆三桂多忌降者往往被戮三桂死同黨復相仇殺滇平之後曹不知所終當時以傳聞之訛入昭忠祠乾隆間 欽定國史列傳列曹於逆臣傳中而祀典未撤嘉慶七年禮臣始奏

撤其位又乾隆二十年江西進士胡中藻以堅磨生詩悖逆肆市胡爲鄂文端爾泰門生故黨於文端刊其詩者巡撫鄂昌文端姪也於是文端撤出賢良祠又乾隆四十三年以舉人徐述夔一柱樓詩狂誕悖逆而爲述夔作傳者沈德潛也高宗以其頌美逆詞追奪官爵宮銜謚典撤鄉賢祠位並仆賜祭葬碑文

入祀鄉賢例由疆臣奏請禮臣覈議道光乙巳以原任大學士盧文肅蔭溥持躬清慎品學端醕特旨入祀不交部議

順治八年定五祀之制中霤門二祀太常寺掌之戶竈井三祀內務府掌之詳見會典諸書無親行祀竈之事雍正間始於十二月二十三日於坤甯宮祀神並面南設天地神位行九拜禮東厨竈神行三叩禮乾隆後皆遵行之所謂有其舉之莫敢廢

也

黃羊祀竈古有其說今十二月二十二日乾清門侍衛至南苑獵取黃羊以二十三日回京供大內祭竈之用

謹按嘉慶御製詩初集毓慶宮小除夜八韻云嘉平小除夜媚竈用黃羊典紀千門徧禮傳五祀詳飴芳裊鼎篆精潔列盤糖足證小除夕宮中祀竈之禮

王貝勒等有內廷差使應直宿者十二月二十三日皆給假回家祭竈以散秩大臣代直

大內祀竈用飴俗謂竈糖每歲十二月奉天內務府備貢運京謂之糖貢

每年二月掌儀司奏派祭黃木神之大臣黃木廠在京師東直門外其木長六丈餘橫臥於地騎者隔木不相見土人稱曰神

木相傳明初建北京時自南方輦致者或謂應甲乙生氣 高宗有御製神木行七古一首

向例郊壇宗廟以太常寺爲專司而宗伯不莅其事乾隆十四年 命隸禮部職掌

舊時齋宮宵漏下鳴畫角嚴鼓以爲節乾隆十四年 高宗謂齋者耳不聽樂此非所以專致其精明也 敕議停止

明洪武時改定祭品祭器然祭器雖存古名而仍代以瓷 高宗始命考按經典範銅爲器頒之闕里而壇廟猶未暇及也後復命考制繪圖一律更造

因事祇告之禮舊時不用樂故祈雨告祭停止作樂 高宗謂祭祀用樂乃事神之禮與齋戒撤懸者不同且樂所以通陰陽之氣也於祈雨宜仍令用樂

乾隆二年例直省壇廟以布政使爲主祭官督撫爲陪祭官道員駐劄之地以府州縣爲主祭官以係地方正印官也然屬官主祭上官陪祭於名分殊未安後山西布政使多綸奏及之遂更定如今制

舊時大學士不陪祀蓋因明代大學士列五品在尙書下文官以尙書爲冠則大學士已在其中我朝定大學士爲一品陪祀之例仍循舊定自尙書以下故大學士遂不陪祀乾隆十三年始改定爲大學士以下齋戒陪祀

乾隆十八年增製祈雨報雨樂章嘉慶十二年增製祈晴報晴樂章

乾隆十七年定凡大畧不用樂以舞童十六人衣皂衣爲二行舞而歌 御製雲漢詩八章

新正 聖駕進官例設儀仗若是日值齋戒之期則停止

祭祀齋戒進銅人初在武英殿後改設 太和殿後又改設

乾清門

康熙時已然

其事始隸禮部後隸太常寺

康熙時已然

銅人西向

銅牌南向齋戒日期王大臣懸齋戒牌自雍正十年始即前明祀牌之義或銀或象牙長約四寸廣二寸懸於衣襟之前

朝鮮歲進糯米四十石 盛京留三石五斗四升官三倉實收

三十六石四斗六升供四時饗祀燔盛之用

按康熙時 南書房翰林查慎行五月朔日 賜高麗米糴

恭紀詩註 上諭云此米本出自高麗 太宗朝歲貢百石

爲端午上供云云是朝鮮貢米已久雍正五年減去稻米三

十石江米三十石每歲貢江米四十石

江米卽糯米

每歲除夕祭 太廟分獻爵帛之王公皆 賜綢緞



先農壇圍牆內有地一千七百畝舊以二百畝給壇戶種五穀蔬菜以供祭祀其一千五百畝歲納租銀二百兩儲修葺之需康熙間將地撥與園頭桑盛無所從出雍正元年命清還地畝仍給太常寺壇戶耕種

祭祀祝版皆清文滿官讀祝須聲音宏亮高下得宜其人臨時簡派皆由太常寺贊禮郎出身者官至一品不復開列然一時無其人雖尙書亦有派讀祝者贊禮亦清語習其業者日夜演贊務極宏遠之音累月經年乃就嫻熟選充斯職卽獲翎頂旣與駿奔之列襄贊無誤多有晉品秩換花翎者京師諺語云十年牕下苦不及一聲噪蓋謂此也

養古齋叢錄卷八終

養吉齋叢錄卷之九

賜進士出身雲貴總督翰林院編修臣吳振棫

舊時殿試策用四六順治己丑科 命除四六舊套初試於天安門外嗣禮部請試於 太和殿之東西閣階下遇風雨試於殿東西兩廡雍正元年十月二十七日殿試天甚寒 特恩試於殿內令鑾儀衛軍校代攜考具內 賜食物爐火策士列坐殿內蓋防於此是年九月會試乾隆五十四年始試於保和殿

按陸清獻公年譜康熙九年三月朔殿試至 太和殿前行禮畢殿上傳策問下皆跪受起就位單東雙西皆立書以立書二字言之似當日廷試與今之就矮桌跪坐而書有異

順治九年壬辰科殿試分滿漢兩榜蒙古歸滿榜漢軍歸漢榜滿狀元爲麻勒吉 賜進士及第出身及一甲授職並與漢榜

同選賽冲阿等六人爲庶吉士十二年乙未科亦分兩榜如壬辰例此後皆滿蒙漢合爲一榜而滿洲蒙古漢軍無入一甲者至同治四年乙丑科以蒙古崇綺爲狀元漢軍楊霽爲探花爲二百餘年所未有

殿試有次晨交卷者更長人倦防閑不能周且非慎重殿廷重地之道乾隆四十六年定交卷以日入爲度不給燭不完卷者准列三甲末

舊時廷試讀卷諸臣各覓公所分住地非鎖院人得自由三五日始行進呈乾隆二十五年始定會集 文華殿銜校刻期竣事之例又策目問條向由內閣豫擬二十六年奉 諭禁止以杜洩漏揣摩之弊 命讀卷官於殿試前一日密擬八條進候欽定四條然後撰策問閒有非讀卷官原擬者如乾隆癸丑

問保泰持盈一條卽 特命發問

舊時二月會試三月發榜四月初殿試康熙丁丑則七月十三日殿試十七日傳臚自改三月會試以後四月發榜五月初殿試乾隆十年改四月二十六日殿試五月初十傳臚二十五年以磨勘故於五月五日殿試初十傳臚二十六年念士子守候時久 命速磨勘於四月二十一日殿試二十五日傳臚至今沿其制閒有因他故隨時酌定者

附錄 道光癸巳科本定四月二十四日拆彌封迨 聖駕由園回宮中路以 孝愼皇后疾亟復折回改於二十九日在園拆彌封引見前十本是日申刻 孝愼皇后升遐次日爲五月朔停升殿傳臚典禮僅將金榜張掛而一甲三人歸第宴集之事皆輟編素二十七日後始朝考六月朔引見授

職

殿試進呈十卷向係預拆彌封乾隆二十六年 命閱定甲乙再拆彌封

舊例廷試策冒十四行後改八行卷尾空白十四行後改十行至欽惟干冒四字必在行末則新舊例同又策式有臣草茅新進云云迨宗室應試後改用末學新進字

近制殿試讀卷官八人康熙間或多至十四人雍正元年十二人其標識優劣有○有△有、有丨有×若標識大相懸絕察看標識大臣具奏請 旨故第一閱者用○則後閱者不用丨第一閱者用丨則後閱者不用○而甲第名次之先後已默定矣

附錄 康熙戊辰殿試仁和凌紹雯用清漢合璧體書置二

甲末

雍正三年准從前殿試違式事故李徽等二十五人再行殿試此特恩也

殿試卷例以前十本進呈惟乾隆庚辰年尙書秦蕙田等奏十本外尙有佳卷特旨許以十二本進是科十四名以前皆入翰林至乙卯年恩科大學士和珅讀卷奏稱無佳策止取八本呈覽是科狀元王公以銜卽會元王公以錫胞兄探花潘公世璜又前科狀元潘公世恩從兄世稱盛事

殿試傳臚日鴻臚寺官唱一甲三人二甲第一人三甲第一人又一甲三人唱名三次以寓慎重之意臚傳畢贊禮官引狀元榜探前趨至殿陛下迎榜抵陛狀元稍前進立中陛石上榜亭出一甲三人隨之由午門正中而出親王宰相無此異數順天

府尹於東長安門外設彩棚爲鼎甲遞酒簪花備執事送歸第  
臚傳次日新進士赴禮部宴堂西北懸飛龍畫軸設香案謝  
恩見石韞玉獨學廬詩註

傳臚後狀元率諸進士上表謝 恩表式則前一科狀元授之  
報以銀五十兩相傳表文爲劉黃岡撰迄今未嘗改作錄之以  
存其式繕表則內閣供事之役亦酬五十金舊例也賜進士及  
第第一甲第一名臣某等誠惶誠恐稽首頓首上言伏以 風  
雲通 黼座太平當利見之期 日月麗亨衢多士協彙征之  
吉書思亮采羣瞻 聖治日新拜手颺言共覩文明丕煥 龍  
章特錫人知稽古之榮 燕賚頻頒世仰右文之盛 閭闔開  
而絲綸式沛冠裳集而環珮交輝橐筆有懷聯鑣志慶竊維直  
言射策金門優特詔之科孝秀明經藥榜重南宮之選羅簪纓



於闕下欣看入穀儲英宣鳳詔於日邊爭識闢門額俊蓋取士  
以得人爲重期梗楠杞梓之兼收而揚言實拜獻先資如舟楫  
鹽梅之共濟名標雁塢邁鉅典之載光臚唱螭頭傳熙朝之  
盛事清班隨玉筍杏花增上苑之輝仙宴泛金卮楊柳湛曲江  
之色遭逢何幸懼忝難名欽惟皇帝陛下乾元資始泰  
運光亨敕幾以亮天功師濟叶賡颺之慶斂福以敷民極  
訓行歸道路之平大孝光照善繼述以綏猷丕承丕顯至  
仁洋溢亶聰明而時乂引養引恬六府孔修正繪繡彰施之日  
九德咸事適菁莪樂育之期固已文煥功巍丕冒均沾乎雨  
露乃猶咨謀迪簡旁求下逮乎芻蕘黃紙頒題遠見雲籠  
華蓋朱衣前引聚看燭盡春星仰承天語之諄詳臨軒咫尺  
俯竭愚忱之固陋對策悚惶何期微末之敷陳輒荷寵榮之

賁及彤墀高唱歡騰驚序班中御筆親題光耀鸞迴紙上  
錫兼金以盈鑑懷歸儒席之珍製宮錦而分袍榮溢藝林  
之采主恩優渥戴高厚以何窮聖澤涵濡思涓埃其奚補  
臣等觀光有願輔治非才誦先憂後樂之言竊慕希文志操講  
正誼明道之學未窺董相精微濫竽而效昌言罔裨經濟握槩  
而談治道祇愧迂疎願布葵忠殫素心而靖獻尙竭駑鈍驥仕  
路以馳驅伏願學懋緝熙德隆廣運風同八表珠囊與  
金鏡齊輝福應九如華祝偕嵩呼並獻羽籥詩書隆造士俗  
咸鄒魯之風股肱耳目廣儲賢廷集夔龍之彥則重熙累洽和  
氣常流咸五登三苞符畢見敷天哀對合麟游鳳舞以呈祥萬  
國來同紀玉檢金泥而作頌臣等無任瞻天仰聖激切屏  
營之至謹奉表稱謝以聞某年月日賜進士及第第一

甲第一名臣某等謹上表

按繆彤臚傳紀事云謝恩表舊例前科狀元代作所以尊前輩以其知體式也甲辰科狀元嚴就思先生給假歸而已亥徐立齋乙未史立菴兩先生皆在籍應求前科榜眼探花而李貞孟吳長庚兩先生亦在籍惟辛丑榜眼李子靜先生在任彤與張董兩同年登堂求見投門生帖用贊儀二十四金賞長班管家銀八兩俱照例也是時鼎甲中最資深者金沙蔣虎臣先生係丁亥探花因己丑有熊次侯先生戊戌有孫惟一先生皆在任虎臣先生云李子靜當讓孫惟一孫惟一應讓熊次侯熊次侯應讓不佞不佞代求李子靜此乃衙門之體一時前後輩俱歎服蔣先生之言良是云云據此則當時之禮與近今不同而表文稱代作似非相傳劉黃岡舊

文矣俟考

附錄 故事一甲三人釋褐拜司成於彝倫堂三人簪花訖所餘備用花一枝歸總理監事大學士攜歸乾隆辛丑大興翁覃溪方綱爲司業是科三元錢湘船聚爲翁己亥所取江南解元也大學士漳浦蔡公謂翁曰此三元君所取士今又親與此禮花宜歸君翁有三元花歌紀其事又一甲三人率新進士詣學釋褐舊制司成及少司成遞酒簪花蔣丹林祥墀由司業遞祭酒嘉慶辛未其子立鏞以第一人登第舉行故事一時傳爲佳話

新進士釋褐禮部具題工部給建碑銀一百兩交國子監立石題名自順治丙戌後皆有碑在太學聖廟戟門外康熙三年輔政大臣裁省自後每科進士各自捐資立石雍正二年復舊例

並補立康熙辛丑科碑

科甲出身重赴鹿鳴宴已不易得本朝二百餘年不過數十人重赴恩榮宴者先後九人而已九人中有三大學士皆在吳中數百里內洵盛事也彙紀於後

原任詹事府詹事黃叔琳順天大興人康熙辛未探花乾隆十六年重宴加侍郎銜

大學士史貽直江蘇溧陽人康熙庚辰進士乾隆二十五年重宴 御製詩以賜

大學士嵇璜江蘇無錫人雍正庚戌科進士乾隆五十五年重宴

原任鴻臚寺卿翁方綱順天大興人乾隆壬申科進士嘉慶十九年甲戌重宴加二品銜

原任通政司經歷郭祚熾江西□□人乾隆癸未科進士道光三年重宴加六品銜

原任戶部主事潘奕雋江蘇吳縣人乾隆己丑科進士道光九年重宴加四品卿銜

原任四川銅梁縣知縣費逢甲江蘇□□人乾隆壬辰科進士道光十二年重宴加知州銜

致仕尙書李奕疇河南夏邑縣人乾隆庚子科進士道光十九年重宴

此下缺一人

順治丙戌科殿試後選擇年貌一百餘人于內院復行考試如殿試例題用奏疏律詩各一俱 欽定入選者用庶吉士見魏敏果年譜康熙九年 命內院同吏禮二部選新進士六十人試以文字分擬上中下三等 上親定二十七人爲庶吉士見

魏裔介傳

館選錄是科庶吉士滿漢三十人

似今朝考所昉然先選後試亦非

每科皆行雍正元年十月

命新科進士於引見前再行考試

一應照殿試預備出詩文四六各題或一篇或二三篇或各題俱作悉聽其便自後則每科行之人人與試矣後來朝考以論詔疏及試帖詩乾隆辛未朝考則賦一狀一論詩如初時湯對松於賦狀論外作試帖四首列第一嘉慶丁丑以擬古詔皆臨時強記非關學問遂裁去惟以論疏詩三者而已向時朝考卷閱卷者僅分取與不取取者謂之朝考入選其取卷分別等第自道光甲辰科始又朝考一等第一名謂之朝元

附錄

乾隆癸丑朝考題目

高宗親書密封屆期發交監

試王大臣疏題爲積古蓋

高宗本定稽古二字下筆時誤

稽爲積也

特製筆誤識過文一篇命軍機交新進士閱看

一甲進士朝考卷另封進呈不由閱卷大臣定擬惟乾隆己酉朝考一體彌封閱定一甲一名胡長齡名在第三一甲二名汪廷珍名在第二一甲三名劉鳳誥名在第五

國初進士殿試後除館選外其餘無分二甲三甲分撥六部都察院通政司大理寺各衙門觀政三月然後銓選見許惟模徐旭齡疏乾隆間有中式進士分派各省督撫藩臬衙門學習三年補授之例見鄂文端疏

聖祖時新進士奏乞讀中秘書或稱家世多任館閣或稱邊遠素少詞臣閒荷 俞允 世宗時令大臣以所知薦用相參覈而蒙古漢軍及邊遠省分每不與選二年太常寺少卿李鍾義請分省簡選停止覆試保舉經部議駁 高宗時既慎校藝文朝考後復令親王大臣集諸進士觀其儀度核其年歲分爲三



等程材論選三十年停止王大臣揀選 命於引見時按省分  
依甲第分班帶領並將上屆某省用幾人開單呈覽引見時於  
名摺上丹圈者以庶吉士用尖者以額外主事用連點者以知  
縣用由是直省人才皆得邀館閣之選

天聰八年 太宗命禮部考取滿人習滿書者剛林敦多惠滿  
人習漢文者察不害恩國泰漢人習滿書者宜成格漢人習漢  
文者齊國儒朱燦然羅繡錦梁正大雷興馬國柱金柱王來用  
蒙古習蒙古書者俄博特石岱蘇魯木共十六人皆 賜爲舉  
人并 賜衣一襲免四丁宴於禮部此 本朝舉人之始其後  
崇德三年六年亦有取中舉人特所試非今制也至順治二年  
秋行鄉試三年春行會試乃爲 本朝定鼎後用書藝經藝設  
科取士之始此後大率鄉試以八月會試以二月亦閒有秋行

會試春行鄉試者雍正元年於四月鄉試九月會試十月殿試

二年則於二月鄉試八月會試

此據學政劉於義奏摺

五年以春季

遇閏二月尙寒改於三月會試至乾隆二年亦以秋閏循例改期至十年始以八月鄉試三月會試爲定例惟十七年壬申鄉試以三月會試以八月外省鄉試則以二月其後嘉慶六年順天鄉試以水改九月道光元年順天鄉試以疫改九月十一年江南改九月二十三年河南改十月二十九年江南改十月浙江改九月則皆以水故也

順治乙酉丙戌科場初開士子應試都門者或以道途梗塞後期始至 朝廷加意招徠丙戌補行鄉試丁亥補行會試康熙閒以用兵故各省閒有補行鄉試且有山東山西陝西在河南考試湖廣江西在江南考試福建在浙江考試之事咸豐以來

亦以用兵故各省多補行鄉試者已未有江南在浙江考試之事

國初四川以兵阻且人民凋敝至順治辛卯始開科主考官駐保甯應試者二百餘人解額有七十餘名之多蓋殊恩也

明季朝政闕茸大比之年逾期不點試官科場展限其後疆吏乃豫請至本朝乾隆閒尙有沿習舊文具本題請者十二年命停止惟令禮部屆期以遠近分次題請而已首雲南貴州次廣東廣西福建次湖南四川次湖北浙江江西次陝西江南次山東山西河南舊時首雲南貴州次四川廣東廣西福建次浙江江西湖廣次陝西江南次河南次山東山西與今題請日期稍異

主考同考之子弟迴避不入場順治閒舊制也雍正元年癸卯

鄉試內外簾官子弟應迴避者別派大臣擬題請 旨考試於

內閣取中四人

是時又命大學士王

命大學士王項麟尙書勵廷儀侍郎

同南書房翰林檢閱落卷

史貽直張伯行李周望阿克敦副都御史李紱

復取二名俱賜爲舉人

二年 命迴避者仍一體應試將

試卷封呈別派大臣校閱自後每科以應否准試請至乾隆九

年 命仍迴避遂爲定例後御史睦朝棟率行陳請奉 旨拏

交刑部治罪嘉慶四年御史郭儀長條陳此事經部議准奉

旨駁飭道光二十七年禮部尙書祝慶蕃以迴避人多面奏另

行考試祝遂左遷其另行考試一事 命永遠停止

磨勘直省鄉試卷自康熙壬午科始 特旨簡派僅三四人後

以卷多始派九卿會勘

會試中額順治閒多至四百名康熙以來多則三百名少則一

百數十名惟雍正庚戌科四百六名爲最多乾隆己酉科九十

六名爲最少嘉慶道光以來或一百數十名或二百數十名無至三百者矣

康熙三十九年以大臣子弟鄉會試取中者多 命月編字號

於是編官字號民卷九官卷一副榜如之邊省免此官卷之始

五十一年停會試官卷近制以省分之大小官卷之多寡定中

額

養新錄載康熙四十一年江南鄉試錄是科始編官卷江南中式八十三人官卷中者八人

按乾隆壬申 太后萬壽恩科鄉試官卷不拘成例請 旨

增減以人數爲差

曲阜設四氏學鄉試編耳字號中一名每科取中皆至聖裔故有無孔不開榜之謠順治乙酉給事中嚴沆典山東試疏請取二人康熙閒增一名顏曾孟三氏及各賢裔始有中式者雍正閒又加一名

雲貴舉人會試給驛馬自順治開始嘉峪關以外新疆舉人給驛馬自乾隆開始會試舉人給路費自順治八年始

順治乙酉山東鄉試法若真以全作五經文 賜內閣中書准一體會試康熙丁卯順天鄉試查士韓林文英壬午順天鄉試莊令與俞長策皆以兼作五經違式特疏以聞得 旨授爲舉人准會試嗣後兼作五經文者不必禁止令各省於定額外加中五經二人於是習者益衆王漁洋分甘餘話所記直隸陝西等省至有以五經卷掄元者五十七年停五經應試中額雍正二年仍准五經應試加中額丙午江南鄉試徐景曾以五經卷中副榜亦准一體會試此尤出於常格之外也至乾隆辛未科始停五經中式之例

按康熙乙酉科長洲蔣學海以五經中式是科進呈題名蔣

列於解元之前稱五經解元見履園叢話

湖南士子赴湖北鄉試涉洞庭風浪之險撫臣趙申喬潘宗洛先後疏請分闈部議未允雍正閒撫臣李發甲具摺請旨御批卽當具題及疏上部復議駁李復奏請甲辰分湖南北爲兩

闈

先一年癸卯奉旨建立湖南試院

副榜之名起於明嘉靖五年見禮部志稿順治戊子科詔天下廩生中副榜者貢至吏部調選其最者以推官用次知縣次州佐增廣附生中副榜者入成均讀書滿一年送吏部歷事考用如廩生例甲午丁酉庚子三科皆舉行至康熙癸卯丙午己酉不許立副榜名色壬子科司成某請舉行復恩允又順治初舉人會試中副榜者免廷試卽送吏部授職康熙三年停止會試副榜又雍正四年直省五經副榜及兩中副榜者准作

舉人一體會試等停止

順治時鄉會試第一場四書藝三篇經藝四篇第二場詔誥表  
內科一道判五條第三場策五道康熙三年甲辰停止四書藝  
經藝改爲二場頭場策五道二場四書論一篇經論一篇表一  
道判五條八年己酉仍復舊制二十六年停止二場詔誥題四  
十一年仍用詔誥乾隆二十二年丁丑易判表爲五言八韻律  
詩移經文於二場二十三年第一場增性理論一篇四十七年  
改頭場四書藝三篇詩一首二場經文五篇三場策五道至今  
循行之

春秋向用一單題二合題一脫母題單題者單傳也二合題者  
合兩經爲一題也脫母題者題在此經而題義則在他經之傳  
中卽他經與此經俱無關也 國初謂脫母題不可訓但取兩



單兩合爲四乾隆初停止合題至道光癸未會試題爲晉侯使韓起來聘夏叔弓如晉復用合題時正總裁爲山陽汪文端廷珍

順治二年定四書文每篇不得過五百五十字康熙二十年議定限六百五十字乾隆四十三年定限七百字爲率

順治二年定四書題第一題用論語第二題用中庸第三題用孟子如第一題用大學則第二題用論語第三題仍用孟子此載科場條例道光庚子山西鄉試首題德潤身心廣體胖次題體羣臣也子庶民也兩題用大學中庸與例不符旋經主考檢舉監臨奏參部議照違例律擬革職留任

英和恩福堂筆記云人言直省鄉試不宜出大學題出則闡中必有火災吳建庵先生於嘉慶戊午典廣東試事題爲此之謂

絜矩之道是科謄錄所遭回祿趙鹿泉先生戊申試江南出十目所視二句至爲文祭告乃發刻是科竟爾無恙揆敘隙光亭雜記云 本朝江南鄉試不以大學命題以明崇禎壬午科題爲定而后能靜三句明南京試盡於此也聞廣東亦然如命大學題則貢院被火或主試者有禍患而尤忌聖經一章云

舊制主司出題四書各分十段簽掣某段卽於此段中擬題再掣乃定五經題則簾官擬本經題候主司擇取簽掣康熙後不拘此例矣康熙庚子科以防錄舊故禁止出冠冕題而仍不免有所拘忌乾隆甲子京闈 高宗深惡夾帶抄襲諸弊因以此謂一言僨事二句紂之不善三句不見諸侯一章命題此後往往爲擬議所不到矣

舊時春秋題主胡安國傳乾隆五十七年紀文達昀奏言胡傳

多有經無傳出題之處不過數十節故本年鄉試五省同出一題且安國是書諷高宗斥秦檜與孔子之意不相比附 欽定春秋傳說彙纂中駁胡傳者數百條 御製文亦屢闢其說請嗣後春秋題以左傳本事爲主參用公穀之說報可自癸丑科始遵用左傳

欽命會試第一場題順治十五年從御史趙祥星請也 欽定順天鄉試第一場四書題目康熙二十四年從給事中張爾淑請也嗣後避暑出哨巡幸他省試題皆由驛封遞至京 乾隆元年 欽派大臣於會試遺卷內選文理明通者續出一榜一體殿試時稱爲明通榜

按乾隆七年會試正榜三百一十九名明通榜六百九十名國初各省鄉試以巡按御史爲監臨康熙初巡按裁以巡撫爲

監臨乾隆閒以封疆任重 命專駐巡撫省分酌委藩臬一員  
監臨十八年仍復舊例令三場完竣卽出闈近則八月二十日  
前後出闈或巡撫因事不能入闈卽委藩司代辦亦有奏請以  
學政監臨者

今制順天鄉試有監臨會試有知貢舉惟雍正元年九月會試  
以禮部左侍郎景日昡知貢舉復以固山貝子領禮部事允禔  
爲監臨

附錄 直省文武鄉試入闈揭曉例應在布政使司堂上筵  
宴今皆在監臨衙門筵宴遇 國恤則停止

順天鄉試及會試榜前考官以擬取前十卷進候 欽定名次  
自康熙乙丑會試始是科 欽定第一爲陸肯堂殿試卽得狀  
元以後遵例進呈仍令考官自定甲乙

刊刻鄉會試試錄殿試登科錄 國初沿明制康熙乙未科不刊鄉會試錄改爲紅本進呈雍正癸卯仍令刊刻主司作前後序內載考官及執事官職舉子姓名鄉貫三場題目士子所作諸藝各一

鄉會試卷向貯南庫積久至不可容嘉慶庚午奏請焚之

舊時京師科場填榜畢捲而橫陳於案考官具朝服九拜然後捧出謂之拜榜各直省發榜不行此禮聞近年京師此禮亦廢按紀文達灤陽續錄以爲試官無拜舉子禮座主無拜門生禮蓋放榜後當以題名錄進呈錄不能先寫必拆卷唱名而填榜然後以填榜之紙條寫錄今紙條猶謂之錄條以此故也拜而送之拜摺之禮也錄與榜並陳於案榜大錄小人見榜而不見錄故以爲拜榜厥後繕錄未完天已將曉試官急

於復命先拜而行遂有拜時不陳錄於案者而拜遂移於榜矣紀說謂聞之阿文勤公所述李文貞公之言也

考試有 欽命題者軍機處先期以上三屆題開單進呈並以本處所存四書一部同進凡自乾隆元年以來已出過試題皆貼黃簽其上惟考御史及廕生及繙譯題由 南書房擬題鄉會覆試閱卷殿試朝考讀卷本科考官向不開列道光乙未命不必迴避惟鄉試覆試則本科考官仍不開列

高年重赴鹿鳴宴者先期具奏輒蒙加銜重赴鴈揚宴者則向未奏也嘉慶庚午科陝西朝邑縣武舉蘭廷薦重赴鴈揚宴始蒙 賞千總銜並 命嗣後先期入奏近則原官階級大者具奏餘則具題文武闡同

宗室子弟與滿洲諸生一體應試編號取中之命在康熙三十

六年至三十九年停止乾隆閒仍考試十七年復停當時考試  
取入一二等者准作進士卽殿試引見授官不由鄉舉也鄉試  
自嘉慶六年辛酉科始時議宗室會試於三月初四日點名奉  
旨初八日入場點名在八旗及各省士子後九年復命於  
三場畢後十七日舉宗室鄉會試十八日舉繙譯鄉會試

按八旗滿蒙試繙譯始於雍正癸卯

駐防文武生員准在各省鄉試自嘉慶十八年始道光閒文生  
改試繙譯試題乃欽定封交主考齎付監臨屆期刊發局試  
試卷彙遞京師欽派大臣閱定取中若干名寫榜封發各省  
八旗鄉會試滿蒙編滿字號漢軍編合字號

士子與考官句通關節國初有問擬腰斬者立法甚峻康熙

己卯順天鄉試壬辰會試

或云庚戌會試俟攷

雍正己酉順天鄉試俱奉

特旨覆試乾隆甲子令各省榜後皆覆試並有鄉會試榜發後嚴行覆試之諭其後或試或停至嘉慶以後新進士無不覆試者道光以來又行新舉人覆試之例

附錄 乾隆己酉鄉試覆試詩題心鏡得虛字 御製詩未發示大學士和珅誤認虛字爲靈字於是通場皆押靈字及發出詩稿和珅方知誤書自請處分

宗室鄉會試中式後在 正大光明殿覆試自嘉慶十九年始其試用一文一詩

新進士向在 乾清宮覆試嘉慶六年後改於 保和殿道光二十四年後皆在圓明園 正大光明殿惟三十年在 保和殿覆試以 聖駕在宮中也咸豐

二字缺

後皆在 保和殿

武進士殿試 上閱馬步射於 紫光閣坐大幄次西階下侍



班者皆東向惟見步靶不能回顧馬射又閱技勇在景運門外箭亭諸臣侍班者領侍衛內大臣二人得賜坐左右以此班侍立最久故有善撲營十人立於起居注官之後備搬移刀石之事

向來 紫光閣閱武進士射先命皇子騎射以爲多士程武道光丁未武進士一甲一名李信一甲二名姜國仲一甲三名不得其人庚戌武進士一甲一名彭陽春一甲二名岳汝忠一甲三名不得其人

順治十二年 上親選武進士二十二人以領侍衛內大臣教習騎射 詔以肇行大典特加優異一甲一名視副將二名視參將三名視遊擊二甲十九名視守備按名食俸十四年 命鼇拜教習武進士今無此制

順治十六年直隸武生送兵部試騎射技勇用翰林爲主考試策論從左副都御史袁懋功請也今制武闈派主考官試馬步射及弓刀石內場默武經不送兵部考試亦不試策論

康熙辛卯准馬兵武鄉試千總把總准武會試各一次旋停文生武生准互試一次文武舉人准互會試一次始於康熙五十三年乾隆丙辰准監生入武場辛酉福建武生某以懷挾文字預藏試院遂以五經中元事發置於理因停互試及監生入武場例

康熙四十八年 命八旗漢軍應武科雍正元年 命八旗滿洲應武科十二年停滿洲武試又武鄉會試射的八十步康熙三十二年改爲五十步

明武生由州縣起送鄉闈布政彙送巡撫中式者下科仍准鄉

試三科中式武舉得爲守禦所千總兩科一科武舉選衛千總其時無進士科也雍正閒武生附入儒學武舉罷三科之制其已爲守禦所千總及衛千總者不准會試

選拔貢生十二年一舉行舊例也順治八年十二年兩次舉行康熙十年舉行一次後張文貞玉書嘗疏請每遇鄉試令各省學政每學舉一人貢入國學雍正元年令六年選拔一次送京考驗乾隆初行廷試例乃 命十二年一舉行

雍正閒欲於各省額設常平穀二千八百餘萬石外增穀三千二百餘萬石特開監穀之例此捐監生之始也乾隆初停各項捐納惟留監穀一條六年令在部收折色在外收本色八年停止九年復開二十八年停浙江江蘇江西等四省捐穀例三十一年停陝甘捐穀例三十九年復陝甘捐穀例四十七年停臺

濟捐穀例嗣後各省或停或復不一而部收折色則爲常例矣  
嘉慶四年以各省封存銀皆以軍需撥用遂令各省皆收折色  
至道光二十二年增定捐武監生例

捐納候選之貢監舉人例不准與鄉會試舊例有捐應鄉會試  
一欸乾隆元年捐例一概停止 命貢監願與鄉試舉人候選  
未得缺而願與會試者一體考試

康熙間三逆初平軍儲不繼聽人輸貲充名巒序號曰例生旣  
而停止其後有欲請復是法者李文貞光地奏以此法妨學害  
正不可行及疏請遂奉駁飭

附錄 咸豐二年楚粵軍務戶部請捐軍功舉人生員奉  
旨不准厥後需餉益急有捐輸數多奏請 賞舉人者亦准  
行

舊時生員無定額大縣多至數十名後定府學二十名大學十  
五名中學十名小學八名當三藩叛逆時開捐生員例文生一百兩武  
生五十兩丁巳戊午庚申辛酉歲科試大學止取四名餘歸捐納不  
限額至癸亥復十五名十名八名舊額後以南巡推恩復  
有廣額之例

養吉齋叢錄卷九終

養吉齋叢錄卷之十

賜進士出身雲貴總督翰林院編修臣吳振棫纂

康熙十七年 詔內外大臣薦舉博學鴻詞十八年試於體仁閣下取列高等授職者五十人一時名儒秀彥多與其選雍正十一年復 命內外諸臣薦舉十三年 高宗御極下 詔敦迫元年試於體仁閣授職者十五人丁巳補試授職者四人八十年中兩開大科側席旁求恩禮優渥極曠古未有之盛其規制除授貫履文字詳見鶴徵錄已未詞科錄詞科掌錄詞科撫言諸書與試人數據典故所載與他書頗異 皇朝詞林

按已未詞科王阮亭池北偶談方渭仁松牕筆乘皆云薦者一百八十六人吏垣牘略云薦舉一百八十六員赴部驗到一百三十一員愚山年譜云同試者一百七十五人藤陰雜

記應考者一百三十三人竹垞年譜云同徵一百九十餘人

柳南隨筆與薦者一百七十四人據已未詞科錄所考證除

取用一等二十人二等三十人姓名俱載館選錄外特賜同

博學鴻儒科二人高士奇勵杜訥

在賦詩一首南書房

特授內閣中

書年老者七人邱鍾仁王方穀申維翰王嗣槐鄧漢儀王昊

孫枝蔚特授內閣中書臨試告病者二人傅山杜越丁憂未

與試者十四人曹溶汪懋麟黃虞稷王穀韋陳學夔戴王綸

林以畏陸隴其惠周惕張貞錢芳標彭桂柯崇樸柯維楨未

試病故者三人葉舒崇郁植陳九勝未試致仕者一人祝宏

坊患病行催不到者十四人應撫謙張新標范鄣鼎王追騏

嵇宗孟蔡方炳陸舜李容黃宗義張九徵魏禧顧景星顧豹

文章貞

中途苦病不與

到京稱疾不與試者二人紀昀王宏撰與試

未用者九十五人閻若璩田雯嵇永福吳雯楊還吉馮雲驤  
畢振姬顧鼎銓葉封陳玉璠陳僖孫榮李念慈吳農祥張瑞  
徵許先甲趙進美陸元輔王念真任辰旦陸次雲許自俊魏  
學渠儲方慶周之道鄧林梓李良年江閻白夢鼎林堯英葉  
灼棠葉奕苞田茂遇馮行賢王祚興徐林鴻羅坤楊毓蘭黃  
始宋維蕃金居敬王岱施清高層雲張英宋實穎譚吉璉王  
孫蔚毛際可王紫綬上官鑑法若真王廷璧李大春徐咸清  
傅辰侯七乘張霍成其愿宋昱徐懋昭陶元淳王鉞董俞李  
芳廣潘颺言徐之凱徐孺芳趙廷錫潘藩大張含輝卽載璜  
李瑞徵陳奕葉方蔚許蓀荃程大呂程必昇趙驪淵陳宏陳  
懷真高向台宋涵馬駿朱培程易朱士曾劉瑞遠戴茂隆李  
開泰邵允彝林鵬張能麟周起莘趙廷颺辭不就者十二人



顧炎武王揆徐夜聞性道萬斯同王曾武李清仲治胡周鼎  
馮京崔華費密後期未試者二人夏駟方象璜舉不及期者  
一人姜宸英補遺二人辭薦不就周容錢肅潤丙辰詞科共薦舉  
二百七十六人取列一等五人二等十人姓名俱載館選錄  
外與試未用者二百二人易宗瀛李鎔長住張振義梁機李  
紘杜詔胡期頤查祥黃之雋周欽徐廷槐胡天游徐文靖鄧  
士錦魏允迪黃世成余騰蛟張星景夏之蓉李春耀劉始興  
劉斯組劉五教車文河韓曾楊述曾陳長鎮鄭長慶傅涵江  
趙昱李光型劉世澍方辛元吳麟黑璫金鑑西成陳景忠趙  
甯靜史鳳輝姚世錄方榮如胡浚李清藻戴永植陳洪淡盛  
樂葉承點王世樞曹愼秦懋紳金焜吳溶馬樸臣于栻俞鴻  
德馮元溥吳銳劉大槐王霖曹廷樞周汝舟沈彤周京汪臺

尙廷楓峻德汪援甲王藻桑調元汪祚陸榮秬盧存心胡二  
樂凌之調趙信丁凝李光國顧陳埏趙永孝朱稻孫沈炳震  
陸枚葉酉楊廷英夏之翰龔正龔元玠王作人王延年沈冰  
壺甘禾饒一辛劉世基裘曰修張範劉自潔閻介年汪士鑽  
陸祖錫邊連寶孫見龍沈德潛倪承茂吳龍見胡鳴玉馬榮  
祖葉榮梓王騰蛟張鳳孫姚焜沈虹王會汾陳黃中張廷槐  
邱迴許鏘顧棟高潘遇莘郭東劉斯翺劉鳴鶴陸桂馨吳張  
元任瑗陳光祚吳榮李希稷梅兆頤江其龍厲鶚周玉章沈  
炳謙張懋建汪沆周珍周大樞萬光泰陳士璠邵昂霄程川  
孫貽年李宗潮錢載金文淳沈樹德申甫鄧牧黃永年廖理  
張錦傳李灝黃天策王士驥方鶴鳴潘思光張甄陶王元芳  
陳繩福陳一策陳大珍陳繼善饒允坡易宗沼鄧獻章陳世

賢王文清張敘段梧生錢斌陳世龍許伯政王元張庚牛運  
震耿賢舉顏懋倫閻式鑛朱超萬邦榮張榮圖王祖庚王系  
張廷奏王起鵬解含章秦涇劉曄許儒龍何夢篆施念曾鍾  
獅勞孝興車騰芳袁枚吳王坦田荃沈瀾毛一驄南昌齡迨  
雲龍不就試二十五人奚源夏策謙方貞觀曹秀先萬經全  
祖望華希閔靖道謨蘇珥屈復褚菊書龔纓余華瑞聞元晟  
王照萬承芾馬曰璐陳撰瞿駿方觀承金德瑛金門詔周振  
采翁照蔡寅斗丁憂不與試四人金虞楊煜曾符曾嚴遂成  
部駁不與試十人汪芳藻于梓張宏敏葉長揚宋照朱士宗  
傅王露邵岷祝維詰許遂已故六人黃濤柯煜魏樞孫天寅  
朱厚章葉翥鳳先試四人陳以剛梅枚許佩璜徐本僊實共  
二百七十人其六人則複薦者也藤陰雜記云丙辰鴻博一

百九十三人誤

附錄 進士釋褐在國子監詞科諸臣釋褐在瀛洲亭

雍正八年舉通曉性理八人並賜進士 曠恩也乾隆元年尙書楊名時薦進士莊亨陽舉人潘永季蔡德峻秦蕙田吳鼎拔貢宮獻瑤監生夏宗潤留心經學 命用爲國子監官屬時楊方管監務也十四年 命內外大臣舉潛心經學之士共四十九人復 命大學士九卿確覈得陳祖范吳鼎梁錫瑛顧棟高四人吳梁以國子監司業用陳顧授司業銜其時陳顧蓋已篤老矣此皆由薦舉命官不由考試者

康熙四十四年 聖祖南巡由蘇州迄江甯 御試士子者三中選者給白金令赴京入各書館此 召試之權興乾隆嘉慶閒 翠華巡幸每舉 召試之典 高宗十二次 仁宗二次

試以一賦一詩一論

或以策

入高等者進士舉人卽授中書生員

賞舉人准會試亦有卽授中書者餘或賚以緞匹中閒淹博之才甚多而邀特達之知躋陟榮貴亦指不勝屈也

附錄

乾隆丁丑浙江

召試詩題循名責實得田字

御

筆草書諸生莫辨押因字思字者多押田字僅二卷難定去取次日復試以蠶月條桑詩第一童鳳三卽押田字卷也

向例散館用五言排律八韻或十韻論一篇不出論題則用時文雍正元年用詩賦時文論四題或作兩篇亦得列高等作三篇四篇者聽其後皆勉爲四篇轉多草率乾隆元年尙書任蘭枝侍郎方苞奏請專試詩賦報可其制遂循行至今

凡散館清書試繙譯餘試詩賦舊例試於體仁閣或保和殿聖祖駐蹕暢春園時則於澹甯居散館世宗駐蹕圓明園則

於吏部朝房散館至 高宗時命於正大光明殿散館今則在保和殿矣 聖祖於散館時每先引見近時則大臣閱卷進呈親定等第越日引見授職乾隆元年命滿洲庶吉士來年以清書散館從教習徐元夢請也二年仍令停止

按散館居下等應改官有奉 旨留館再教習三年者康熙閒如何義門諸人是也乾隆以來亦每有之又散館有革職者如康熙閒張禹玉是也

附錄 孫淵如星衍以一甲授編修散館題爲厲志賦孫用躬翊如畏時和坤當國指爲別字抑置二等改官故事一甲授編修者散館居下等或仍留館卽改官可得員外有使孫詣和者孫不往遂改主事自後凡散館改部皆以主事用又嘉慶元年散館 高宗偶檢賦彙所載汙卮賦爲題試者

不知爲傳咸所作誤解爲元結之窪尊多有傳會失旨者  
世祖最重庶吉士每親自考校乙未館選丙申特先授漢書庶  
吉士王益朋王命岳等官給事中及御史戊戌館選己亥試於  
南海子特先授清書庶吉士馬晉允富鴻業等十人爲編修檢  
討而陳敬殷觀光二人革職皆非散館故事

按熊孝感集李平傳云順治閒每遇雙月試庶吉士於太和  
殿

大考閱卷掌院不開列庶常散館掌院教習皆不開列道光辛  
丑散館潘穆兩大學士方爲掌院教習而派閱卷則 硃筆添  
入也

順治十年 御太和門親試兼翰林銜吏部侍郎成克鞏禮部  
侍郎張瑞及內三院學士劉宗正編檢以上官六十二員君子

懷德論一篇請立常平疏一道有留任者有改外任者編檢以

上官照詞臣外轉舊例優與司道等缺年衰病弱請告者聽此

御試廷臣之始

此次上諭命吏禮兩部翰林侍郎及三院十學士詹事府詹事以下各候親試分別高下

五年御試除三院學士外翰林官皆與試才堪外任者照前

例酌與補用其時蓋以外轉爲優惟考清書翰林有內升者

年一次十三至康熙閒習漢文者始與內升十八年己未侍講牛

鈕試列第一卽日除侍講學士是也其後乙丑

初試一賦一五言排律再試一

辨一記一

甲戌

初試一賦一

乙未

一詩

凡三試優者獎勵劣者

或降調或對品調用時詹事尙與試甲戌取列第一徐秉義卽

詹事也據居易錄壬午亦大考翰詹雍正閒未之舉行然元年

正月嘗以寶座銘考試翰林諸官有編修成文以措詞不當鐫

職是亦猶後之大考乾隆二年丁巳以後則自少詹以下乃與



試試題一賦一詩其一則策論疏無定大率開四五年卽一試  
卷分一二三四等有遷擢者有降調休致者惟乾隆癸亥試  
後又覆試休致翰林有起用改補及留任者庚寅辛卯辛亥  
翠華巡幸休致翰林鄭岱鍾等迎鑾獻藝因再試之皆邀起用

曠恩也

考試翰詹等官試卷俱彌封自乾隆二十八年始

向來大考翰詹在兩書房行走者皆與試乾隆三十三年大考

中允曹文垣編修彭元瑞沈初董誥方直 內廷奉 旨免試

尋以四人學問皆優未得升轉特加一級以示寵異道光十九

年二月大考 命上書房行走之賈楨不必考試二十七年五

月大考 命上書房行走之葉覲儀沈兆霖不必考試

是時南書房

無翰詹以下官

乾隆以來大考翰詹以一日而畢按王士禎居易錄云壬午冬駕歸自德州考試內直諸詞林官至二十二日封印後一日始畢定一二三等等調知縣用是當時試事甚詳慎非止一日也

向來大考編檢升至學士已爲最優乾隆閒阮文達元擢少詹事尤爲異數是年阮卷列一等第二 高宗拔置第一滿洲翰林缺出先用內班內班無人例用外班充補迨考試詩賦以非所素習輒以下等改官道光二十七年 宣宗以繙譯爲滿洲本業每科繙譯會試中式者止用部屬升途較隘命將此項人員轉入翰詹衙門一體升轉遇考試翰詹之年卽照向例考試繙譯

康熙二十三年 御試八旗文學之臣以 御製竹賦爲題繙

譯以觀滿漢文義自通政使以下筆帖式以上五百餘員此則專試繙譯非試翰詹也乾隆閒試外班翰林或論或繙譯不以詩賦惟五十三年試八旗翰詹出身大臣官員五十六年試八旗翰詹官則皆用詩賦

康熙六十一年七月試熱河隨駕官三十三人詩題萬家烟火隨民便文題上天之載無聲無臭取一等五人原庶吉士傅敏即福敏舉人徐覺民貢生成禧翰林院侍讀王國棟主事色舍立次等三人監生孫廷樞侍衛趙宏濟員外郎顧琮字取一人侍衛崔起潛皆旗人此又專試旗員之隨駕者

庶吉士散館翰林大考京官考差各試卷

散館用卷有朱格大考考差皆用白摺

舊時另紙起草乾隆閒始有添寫草稿之例然卷俱進呈於體制殊未協嘉慶四年仍復另紙起草舊例

雍正三年始定考差例凡由進士出身官員定期試以書執彌封呈覽 欽定等次記名識以牙籤貯以金筒臨遣時大學士齋至午門每省掣正陪各一員引見差用然非每科必考也考取人員漸少則復試一次而已乾隆元年應行恩科鄉試 命張廷玉鄂爾泰朱軾徐本邵文基任蘭枝徐元夢福敏孫嘉淦楊名時于翰林科道部屬內各舉數員于五月送內閣彙奏試於保和殿第其高下引見記名以備簡用至三年則無論保舉與否一體考試九年 命大學士尙書侍郎保舉再行考試十二年以各科舊例不同外閒議論不一 命將應開列人員通行考試其不願試者聽仍著大學士九卿各舉所知密封送內閣進呈聽候酌用三十三年停止考差由各衙門揀選引見自後則鄉試年分皆考差其試卷由閱卷大臣排定名次嘉慶十

五年令不必排定名次惟于所閱之卷分取與不取而已以御史周廷森有閱卷名次外間傳說紛紛之奏也又嘉慶己未分校而未經考差者七人道光癸未分校而未經考差者五人咸豐辛亥壬子兩科則未試而得差者居十之三四

向來考差文字入選等第名單交禮部部臣請簡時夾單開列乾隆丁酉不發出名單己亥仍發出己亥後皆不發出凡考差者通行開列請簡

會試順天鄉試考官本不發批本處於入簾日派乾清門侍衛齋至午門交大學上拆封同稽察御史宣旨唱名是日凡考差者皆往聽宣其內廷行走者如點充考官預令前往宣旨訖入闈與不入闈者均不得逗遛違者劾奏自嘉慶己卯始因御史袁銑有飭遵功令之奏也日久懈弛入闈者不卽往咸豐己

未以戊午科場事發鄉試時 上密派御前侍衛至貢院查點  
有遲至申酉閒入闈者奉 旨嚴飭

考試試差向用四書文二篇詩一首嘉慶己卯裁四書文一篇  
增五經文一篇

順治閒鄉試正副主考指定某衙門官差往某省如順天江南  
正副主考浙江江西湖北福建正主考差翰林官八員他省以  
給事中光祿寺少卿六部司官中書行人評事差往皆有一定  
至康熙閒始以各衙門應差官員職名通行開列請簡

康熙閒奉 旨派出主考房考宴於禮部 賜金花綵緞表裏  
各有差宴畢始入鎖院後來慎重防閑宣 旨後卽促令入鎖  
院無復宴賚之事

舊例修撰祇充會試同考不典鄉試典試自康熙己酉徐元文

以待讀典陝西試始見池北偶談

祭酒有考錄貢監之責舊制不得典順天試乾隆甲子祭酒崔  
紀典順天鄉試 異數也

雍正癸卯嵇文敏曾筠以河南巡撫爲河南正考官壬子少寇  
王蘭生以安徽學政爲江南正考官典試由外改充爲前此所  
未有

順天鄉試主考凡籍隸順天直隸者應迴避惟乾隆癸卯翁洗  
馬方綱道光壬辰白總憲鎔俱爲副考官不迴避翁大興人白  
通州人

順天鄉試主考順治乙酉丙戌戊子用二人辛卯甲午用四人  
此二科分滿漢榜其二人乃閱滿文者以後滿漢皆用漢文通  
爲一榜故歷科主考皆二人至乾隆庚子以兵尙蔡新爲正主

考刑侍杜玉林閣學嵩貴副之三主考實始於此後沿爲例惟嘉慶庚午用二人道光壬辰用四人咸豐己未用四人又案雍正以前順天主考凡編檢部屬皆簡用不必盡大僚雍正癸卯科後編檢等官無復主試者

會試總裁順治丙戌用四人清秘述聞所載爲范文程剛林甯完我馮銓按魏敏果中丙戌進士年譜載座師四人有所充格無甯完我譜爲敏果自述當不誤丁亥壬辰用六人已丑則多至七人剛林所充格范文程洪承疇甯完我宋權王文奎乙未四人戊戌己亥辛丑皆二人康熙丙戌己丑戊戌己亥辛丑用二人餘科皆四人雍正癸卯二人癸丑三人甲辰庚戌皆四人乾隆丙戌丁巳己未壬戌乙丑戊辰辛未皆四人壬申甲戌丁丑辛巳癸未丙戌三人己丑二人辛卯壬辰乙未戊戌三人庚



子辛丑甲辰四人丁未己酉庚戌癸丑乙卯三人嘉慶丙辰三人四年己未用四人以後率用四人爲常至道光己丑則用五人曹振鏞玉麟朱士彥李宗防吳椿近科又有用三人者

附錄 乾隆戊戌會試總裁爲于文襄敏中王文端杰同考則秦大成陳初哲黃軒金榜皆殿試第一人也在京狀元無不入闈者一時以爲盛事

附錄 雍正元年癸卯會試以試官持擇公允加朱軾太子太傅張廷玉太子太保優渥之典前後所無

舊例翰林給事中同爲考試官以翰林爲正給事中爲副吏部與五部同爲考試官以吏部爲正五部爲副至康熙間卽不拘此例

康熙壬午鄉試以副都御史張睿爲陝西主考御史吳甫生副

之以御史劉子章爲江西主考御史傅作楫爲浙江主考庶吉士孫枝彌爲山西主考香祖筆記載之云都御史御史庶吉士典鄉試自是科始己卯以編修阿金爲福建正主考滿保爲浙江副主考喀爾喀爲河南副主考法保爲陝西副主考居易錄載之云滿洲翰林官典鄉試自此始

清秘述開法保作海保

附錄 國初主考奉使不必卽行回京亦無定期遂有恣意遨遊者康熙閒限命下五日卽行李紱雲南驛程記頗言踰躅出京之狀雍正閒始令寬期治裝至乾隆時復有出京過遲者乃飭部酌定日期

順治三年定會試順天鄉試同考官二十員內用翰林官十二員六科官四員吏禮兵三部司官各一員戶刑工三部司官每科輪用一員

按清秘述聞載順治丁亥會試十七員己丑會試二十一員恐是錯漏

至康熙三年

甲辰會試以後皆十八員

癸卯鄉試闕

十八房蓋自此始

清秘述聞載戊子鄉

試十六員

五十四年乙未令不同省同考官每房二人同閱有

弊並坐鄉會試同

據此當用三十六員而清秘述聞載乙未戊

譜載丙戌房師魏天賞岳映斗

雍正元年癸卯鄉試每房仍用

二人豈當時每房亦二人耶

清秘述聞載乾隆丁卯

是脫漏

撥房之例雍正七年議定

各省鄉試房考舊制以科甲出身州縣派充雍正七年己酉停

現任知縣入簾調取鄰省候選進士舉人大省三十人中省二

十五人小省十五人接界三百里內者不得咨送乾隆丙辰停

止調取鄰省進士舉人例仍用本省官

順天鄉試同考官向用京官康熙庚午用知縣何訥等十五人

居易錄載之謂用外官自是科始按先此丁巳鄉試已參用知縣王錫輔等六人庚午以後各科多無考惟戊子科有知縣梁通洛等五人雍正以後不復用知縣

國初鄉會試分房不全用進士出身人員亦兼用庶吉士及知縣順治丙戌會房兵科郝傑辛酉舉人丁亥會房刑科梁維本辛酉舉人乙未會房兵部郎中楊陞戊子舉人已亥會房富鴻業馬晉允吳珂鳴王吉人郭諫王颺昌彭之鳳崔蔚林吳本植俱戊戌庶吉士辛丑會房王遵訓田麟楊正中李天馥陳廷敬周訓成蘇宣化翟世祺朱錦周之麟鍾朗金國用陳志紀盧乾元趙之符趙濟美俱己亥庶吉士禮科姜希轍壬午舉人康熙甲辰會房禮部主事俞有章乙未會房副兵部主事蔡兆豐辛丑會房副癸丑會房兵科余司仁戊子舉人丁巳鄉房王錫輔周之

麟皆進士知縣黃壩彭孫通華章志沈珩皆進士候選知縣戊辰會房兵科陳世安丁巳舉人甲戌會房兵科趙心抃壬子舉人工科彭鵬庚子舉人戊子鄉房工部主事歐陽方曜甲子舉人梁通洛王家驊薛祖順陳守創李先立俱進士知縣雍正癸卯鄉房鄭江夏力恕何朗侯來旌關上進晏斯盛黃煥章吳械俱辛丑庶吉士會房御史許容辛卯舉人壬子鄉房陶正靖曹一士楊廷棟裘思錄皆庚戌庶吉士

乾隆丙辰會房崔紀係祭酒汪由敦係四譯館少卿辛酉鄉房朱必坦壬子舉人甲子鄉房鍾鳳翔邵齊燾姚範孫廷槐凌鎬周孔從王鋌王康佐劉錫齡黃遇隆皆壬戌庶吉士庚辰會房錢大經庶吉士至甲午順天鄉試分校於例不開列人員內用京堂七員小京官四員宗人府府丞寶光鼎太常卿吳王綸光

祿卿吳綬詔大理少卿周於禮太僕少卿曹學閔通參趙佑司業朱棻元大理寺丞朱衣點江南拔貢國子監助教吳省蘭江蘇舉人學正徐立綱乙酉順天舉人學正汪如藻己卯浙江舉人此又不拘成例者

鄉會試主考同考及讀卷閱卷官俱不得襲師生之號違者重處見康熙十四年 上諭雍正八年始許座師房師以師生往來

舊制各省學政或稱學道或稱學院學院用翰詹科道官學道則繫以按察使僉事名由六部郎及知府有資望者推用其後遇缺員請 特簡順治四年學道專用部屬考選禮部二人戶兵刑工各一人內閣與吏禮二部會考十六年從尙書孫廷銓奏仍依舊例康熙三十九年以翰林官專司文翰無他事各省

學政員缺應與郎中並差四十二年定由京堂翰詹科道任者爲提督學院由部郎任者仍爲提學道雍正三年由部郎任者加翰林銜自是以後各省學政無道銜矣各省分併更改先後有可考者附錄於後

直隸省初設監察御史一員提督學政順治十年定專用翰林官今稱順天學政舊時編檢中贊講讀皆差乾隆以來皆用卿貳 江南省順治二年上下江分差督學御史二員九年併一員十年停差御史上下江分設督學翰林二員十二年用僉事二員爲提學道停差翰林康熙元年裁改學道一員二十四年復用翰林雍正三年分上下江各一員稱江蘇學院安徽學院 江西省舊以僉事爲提學道康熙四十六年差學院 浙江省舊設提學道康熙二十三年改用翰林

官提督學政

福建省舊爲提學道康熙四十二年用翰林

官爲提督學院

湖廣省初分設湖北督學道湖南提學道

順治十八年改湖廣通省提學道康熙四十二年用翰林爲

提督學院雍正三年湖北湖南各設一員山東省舊設提

學道康熙四十二年後皆提督學院河南省舊設提學道

康熙四十二年後皆提督學院山西省舊設提學道康熙

四十二年後皆提督學院陝甘省舊設提學道康熙四十

一年後學道學院兼差五十年後皆提督學院四川省舊

設提學道康熙四十五年改學院廣東省舊設提學道康

熙四十五年改學院

按五十三年鄭晃以郎中任當仍稱提學道

雍正七年分設

廣韶肇高兩學政乾隆十六年併設一員廣西省舊設提

學道康熙四十二年改學院

按五十九年徐樹敏以戶部郎中任當仍稱提學道

雲



南省舊設提學道康熙四十一年改學院 貴州省舊設提學道康熙四十一年改學院

正科鄉試之年至秋點派各省學政自康熙五十三年始一甲授職未散館卽簡放學政自乾隆庚戌修撰石韞玉爲湖南學政榜眼洪亮吉爲貴州學政始

雍正前有提督滿洲蒙古繙譯學政以滿侍講侍讀充後裁國初督學御史提學道不專用進士出身人員順治六年江南督學御史季嵩陽前庚午舉人十七年湖北督學道王自新乙酉舉人十八年湖廣通省提學道魏學渠戊子舉人康熙三年浙江督學道李如桂戊子舉人山東提學道王鑑河南貢生雲南提學道何起鵬奉天舉人六年江西提學道吳煒順天舉人七年江南提學道簡上四川舉人

乾隆乙卯瑚圖禮以候補四品卿爲山西學政道光乙巳戴熙以候補侍讀爲廣東學政亦曩時所未有  
乾隆初河南巡撫雅爾圖奏學政不得帶家眷經九卿議行七年停此例

養吉齋叢錄卷十終